

قلب شاعر

للشاعر / مجدى حسن



حقوق الطبع والنشر محفوظة

لدار الأدبا



اسم الدار	دار الأدباء للنشر والتوزيع
ديوان	قلب شاعر
للشاعر	مجدى حسن
رقم الإيداع	(٢٠١٧/٢٠٧٨٨) بدار الكتب المصرية
الإخراج الفني	دار الأدباء. (عبدالرحمن الصباحي)
الغلاف	من تصميمات الدار

إهداء

الى أول قارئه لأشعارى
الى من علمتنى ان أحب عطاء
فقط عطاء..

اهدى ديوانى الأول الى روحها الطاهرة.

الشاعر: مجدى حسن



المقدمة:

الشعر العامى : هو الشعر المنسوب الى اللهجه العاميه .. وهى اللهجه التى تتكلمها عامة الناس فى حياتهم اليومية ويطلق الشعر العامى على كل نظم بلهجه غير اللغة العربية الفصحى فأى شعر خلاف الشعر الفصيح يطلق عليه شعر عامى أو شعر شعبى بلغة اهل البلد الدارجه.

وتخرج من الشعر العامى..الأغانى الشعبيه والتراثيه التى تعبر عن عادات وتقاليد كل شعب من الشعوب العربية.

وعليه فقد خرجت من فنون الشعر العامى انواع منها :

الهجج: وهو الغناء الخفيف المنتشر بالاغانى الشعبيه واغانى الافراح والفلكلور الشعبى .

الرجز: وهو التطريب وانبثق منه فن الانشاد وفن الموالم .

ونحن نصول ونجول داخل صفحات ديوان (قلب شاعر) للشاعر المتميز مجدى حسن نجد انه وقف على ناصية معسول الكلام وتمكن من خواص وجماليات اللهجه المصريه بجداره وذلك عندما امسك بقلمه وابحر فى عالم الرومانسيه فأخرج لنا درر ثمينه تستحق ان يفتح لها بوابات القلوب لتدخل منه على احساس ومشاعر القارئ المحب للشعر العامى .

ونحن نتجول فى ديوان (قلب شاعر) استوقفتنى هذه القصيده الرائعه والتى عنونها الشاعر واطلق عليها اسم ((شريط ذكريات))
استهل الشاعر القصيده وهو يقول بلسان حاله:

حاولتى كثير تنسينى الى فات



وقلتي الماضي كان عايش ومات

لقيت ايامى محفوره

لقيتها صوره ..ورا صوره!!

مشهد ممتع ونادر ولكن الشاعر جسده بأثقان وهو يقول لمن ارتبط بها
بأنه مازال متذكر حبه القديم الذى طبع فى ذهنه صور ذكريات متتابعه
لا ينفك ان ينساها .. ولم تستطيع تلك الأخرى ان تنسيه محبوبته
الأولى .. قمة الرومانسيه المفرطه مع الاخلاص النادر الوجود .

وكل دقيقه فى الماضى على شريط ذكريات

واقارن بين لياليكى .. ولياليها

واحساس روى بعينيكى وبعينيها

واحساس لمستى ايديكى .. واحساس لمستى ايديها

مش حكيت اول كلامى واعترفت بحبها

قلتى هينسيك غرامى كل لحظه عشتها

قولتلك كانت هوايا والنجوم اللى ف سمايا

عاشت الايام معايا شمس روى وضلها

رغم انك بتعيشينى .. وف عيونك خبتينى

روى كانت بتسهينى تاخذ الحلم وحنينى


كل لحظه من سنينى وتجرى تسكن حلمها

وهنا يبدأ الشاعر فى المقارنه بينها وبين اخرى ويقول اقارن بين لياليكى
ولياليها .

واحساس روى بعينيكى وبعينيها

واحساس لمستى ايديكى واحساس لمستى ايديها

ما ترك شئ من تفاصيلها الا وقارن بينها وبين الأخرى



وقد جاءت لحظة الاعتراف
مش حكيت اول كلامى واعترفت بحبها..!!

ويسرد الشاعر قائلاً عن حبها الذى مازال يعترف به..فياله من حب اخذ
فى التمكن من غرف القلب وجوانحه

قللتك كانت هوايا والنجوم اللى ف سمايا
عاشت الايام معايا شمس روحى وضلها
رغم انك بتعيشينى .. وف عيونك خبتينى
روحى كانت بتسهينى تاخذ اللحم وحنينى
كل لحظه من سنينى وتجرى تسكن حلمها

وكانه يذكرنا بقيس ليلى وهو الهائم على وجهه فى الشوارع والطرقات
يقول:

اشتكت منى الشوارع
سبت بيت وسكنت شارع
تهت عن فجرى اللى طالع
فجرى كان مع فجرها
اتعلمت معاها اول كلمة حب
وسمعت ف دنياها اول دقة قلب
لو فكرت انساها صعب ومليون صعب

الصعوبه فى ذلك تكمن فى أن للشاعر قلب ينبض بحب قديم لا يستطيع
ان يتبرأ منه فقد نبت فى قلبه واصبحت جذوره ضاربه فى الوجدان لقوله
سمعت فى دنياها اول دقة قلب .. فقد ولد حبه الأول على يدها فكيف له





ان ينساها أو تنسيه اخرى هذا الحب الذى تعلم معه هجاء اول كلمات
الحب الصادقه .

وعشان يرتاح ضميرى خرّجتك من مصيرى

يمكن لو سيبتى حضىنى تعيشى حضىن غيرى

لآخر سطر فى كتابى هعيش راهب فى محرابى

صورتها وشم على بابى حبيبتى وليا اسبابى !!..

اعلن الشاعر رهبنيته .. ورفض ان يقايد حبه القديم

ما اعظم التضحيات .. وصدق المشاعر لدرجة ان الشاعر رسم لنا
صورهتصريحه غايه فى الروعه وهو يقول (صورتها وشم على بابى)
ليصرح بأنه لن ينسى حبه الأول فهى وشم لن يقتلع فقد نقش على بابه
والقصد هنا باب قلبه وله بالطبع أسبابه فى التضحية كونه محب عاشق
طاهر القلب عفيف المشاعر وهذه صفات المخلصين .

ونختم فنقول: كتبت قصائد هذا الديوان بلهجه رقرقه تميز بها الشاعر
فصاغ بها مفرداته .. لدرجة اننا تعاشنا مع قصته الغراميه وصوره
الجماليه الموحيه والتي دخلت علينا القلب كونه كتبها بأحاساس خارج من
قلب شاعر .. فمست منا شرايين الوتين .

تقديرى لعبقريّة شاعرنا المتميز .. متمنياً له الرفعه ومزيد من التوفيق.

د . سيد غيث ..






أصدقاء ..!!


يعنى ينفع نبقى تانى أصدقاء؟
ما احنا كنا اصدقاء
كنت ليه خليتنى احبك قلت ليه
الحب هيكون احتواء
يعنى ننسى لمسة الايد اللي بيئا
واللا ننسى حضن بينور سنيئا
واللا ايام يوم فرحنا ويوم حزنا
دا انت شاعر انت فاكر عندي مفتاح للمشاعر
يوم حبيبي يوم صديقي يوم غريب شفته ف طريقي
التي بُعدك عنى عادى واخفى جوايا الحريق
بحر شفت سطحه هادى انزله القاه غريق
لا وحبك لا وقلبك مش هنفذ حكم اعدام البرئ
إما بس تكون حبيبي او نقول للشمس غيبي
هوا يعنى عشان عشقتك اد روحى
يبقى همك كل همك قتل روحى





الحياه كانت حياه لما كنت معايا فيها
فيها فرحه وفيها آه بس بوجودك ماليتها
اتقفل باب العتاب والسؤال مالهوش جواب
وف كتاب الحب اول سطر كنا
شلت اسمى ليه فى لحظه م الكتاب
مش صحاب مش صحاب عمرنا ما نكون صحاب
مش صحاب مش صحاب ايوه بعدك قمرى غاب
بس هاخذ حقى منك كله فى يوم الحساب





كر سين وشمسيه ..!!

وبان الحزن فى عينيه على عاشق غدر بيا
وقلت ابعده اروح لبعيد وتبقى القصة منهيه
وكانت شنطى فيها حاجات ما فيهمش حنيه
انا والرمل والميه وكرسين وشمسيه
فى حوض الموج لقيت سمكه حدفها الموج لرجليا
كان السمكه عاشقانى ومحتاجه ملاغيه
بتحكيلى وبسألها نسيتى واللا منسيه ؟؟
عنيها تقول قتيل الشوق مالوش لا حقوق ولا ديه
ولحظه غمّضت عيني يدوب غمضتها شوبيه
لقيت السمكه مع غيرها وفجأه سابونى وحديا
انا وطوفان من الذكرى ورعشة عشق فاديا
حببتي اللى سايبها هناك معايا ف شنطى جايه
وذكرى قصه عشناها فى سرايىني معديه





وفجأه سمعت صوت جنبی و بیدندنلی اغنیه
زمان کنا سمعناها عشقناها انا وهیا
لقت ع الكرسي قدامی حبیبتی للهوی جایه
وجایه معاها احلامی بتشرح عذرها لیا
عرفت ان الهوی عمرین یضیع ازای ف سفریه
ولیه انا جبت کرسیین مجبتش بس کرسیاً






حب كبير...!!

كنت بحبك حب كبير حب قدر وابد ومصير
يعنى ماكنتش لحظه اتصور انى ف يوم هנסاك واتغير
وانى ف يوم على بعدك هقدر واكسر باب العش واطير
انا كنت طير فرحان بأسره وبسمك احلى الأنغام
وحبى لىك الكون بأسره وكلام عيونك احلى كلام
تعالى نسأل العشاق تعالى نسأل الأشواق
مين العاشق ومين فينا رسم سكة دموع وفراق
مين اللى حب من قلبه ومين الحب كان ذنبه
ومين عاش للهوا فينا ومين ادا الحبيب بسخاء
بيشهد كل شئ بيننا ايدينا قلوبنا وعيوننا
وكل ركن من بيتنا وكل مخدّه شالتنا
ونجمه ف ليله صحبتنا تنور لينا سهرتنا
ولحظة فرح عشناها ولحظة حزن عاشتنا
ما كنت غرامك الأكبر وكنت لشايك السكر
وكنت تنام وانا اسهر اشاركك حلمك الأخضر





فاكر كنت ازاي ويايا كنت لعمرى امل وطريق
كنت بحبك من جوايا قلبك بحر وقلبي غريق
واتغيرت بقيت انسان غير اللي عرفته وحببته
راح الاخضر م الالوان هديت اجمل حلم بنيته
زى ما بعت انا بعت غرامك ونسيت ايامى واياك
ونسيت مد الايد لسلامك ونسيت فرح العيد بكلامك
سبت معاك فى العش عواطفى سبت هواك وحنانى وعطفى
يا خسارة عمر فات يا خسارة عمر جى
يا خسارة حلم مات وكان جوايا حى





مسك وعنبر ..!!


ايوه ضعفت لما قابلت عينيكى وشففت
فيها طريق مكتوبلى امشيه بحر غريق لازم اعديه
ايوه عشقتك لما قابلتك ودخلتى القلب ملكتيه
كل كلام الحب لاقيته مش هيوصلك معانيه
اصل الحب اللى انا حبيته ساكن فيا وساكن فيه
حبك غير كل مافيا نور ايامى ولياليا
خلى دموعى دموع افراح بعد ما كنت غريب سواح
بظلم نفسى واحضن ياسى صدر لقيته عليه بارتاح
رجعتينى لأحلى سنينى حبك عالج كل جراح
رمشك غير لون الكون اصله بيحرس احلى عيون
طعم شفایفك اصل السكر خدك ورد وجسمك مرمر
لما تمرى ولو فى خيالى بتفوح ريحة مسك وعنبر





علمتيني اعشق واتحب رجعتيني لدق القلب
قُربك حب بُعدك حب كل ما فيكي حاجات تتحب
خليكي ف حضني وخليني علشانك اتحدى الصعب
لو هتغيبي ف يوم عن عيني تبقى ظلمتي الروح والقلب
بُعدك حب قُربك حب





الخاين مش هوانا ..!!

مخدة الخيانه كانت دايماً معانا
تشهد على صدق حبي واخلاصي ف هوانا
وف ليله جيت اقبالك لقيت عليها غيري
لقيتها نايمه جنبك في حضنك وف سريري
بتقول نفس الكلام في عيونها وشعرها
وبأشعار الغرام بتسمم عقلها
لقيتني ف غربه تايبه وبسأل عن مصيري
ازاي سلمته نفسي واديته ضي شمسي
واسأل من كتر يأسى معقول بيحبها
لقيتني بجري وحدي ودموع بتشق خدي
نفسى تبلعني ارضى وما اشوفش بعدها
بخلت عليك بايه هتاخده مئها
وليه بتخون وليه ليالينا بعثها
الخاين مش هوانا في دمك الخيانه





الحب بيهدي روحنا للصدق والامانه
بتقطف كل زهره و تشرب من عبيرها
وترجع تانى بكره وتقطف زهره غيرها
لابتهمك دموعها ولا يهمك مصيرها
بندم على كل ليله فى حضنك عشتها
كانت احاسيس جميله خنت و ضعيتها
يحرم عليك حبي طول عمري يا قلبي
مش هتخدع تانى صبرنى ياربى





خلود...!!

انا ليك لوحدهك ولا حد بعدك ولا حضن
غيرى من حضنى ياخذك
طمئن عينيك انا عايشه بيبك مع ان قلبى حزين عليك
واحنا بنبدأ حلمنا كان بُعدنا مكتوب لنا
لا بعدنا يوم عن بعضنا ولا كان فراقنا بيدنا
على اد شوقنا وحبنا الموت كان اقوى منا
كتب علينا نفترق تسبقنى عند ربنا
كنت اتمنى تاخذ روحى اموت وياك
كنت اتمنى يوم ما خدوك ياخدونى معاك
كنت اتمنى تاخذ عقلى عشان انساك
او تستنى احلم ليله ف حضن هواك
ماليش خلاص بكره وهعيش على الذكرى
على ماضى ايامنا ويجرا مايجرا
امسح دموعك ابتسم خلىنى وياك ابتسم
بفرح اوى لما ابتسامتك ع الشفايف تترسم
تعالى فى الاحلام سمعنى احلى كلام
لو لحظه نتلاقى ونرجع الايام





اوقات كثير بنظير سوا روحين على جناح الهوى
لما الملايكه يحرسوك ولحد عندى بيحبوك
بيسدونى ويسعدوك وف الميعاد بيرجعوك
حاسه بأديك بتضمنى بعينيك تقول اطمنى
متيأسيش ولا تحزنى فى الجنه قصر بيتبنى
مكتوب لاحلامنا الخلود بمقاش يحكمها الوجود
لا ف يوم تفرقنا السدود ولا للزمان يوم ننحنى






شہر تـك ..!!

لما انتى مش حسانى دخلتى ليه شريانى
بنيت عليكى أمانى وف لحظه الحلم ضاع
شهدتلك انك خبيره فى الخداع سلمتلك
سلمتى قلبى للضياع

لما سلمت لهواكى وابتديت احلم معاكى
بعتى قلبى اللى اشتراكى واشتريتى قلب باع
غدر قلبك زى اسمك زى صوتك زى رسمك
يعنى كل حاجه فيكى كل نظره من عنيكى
كل لمسه من اديكى كل وقت وله قناع
كان عشانك مش عشانى لما دخلتك زمانى
كنتى محتاجه لحنانى كنتى محتاجه لشراع
كنتى مجروحه وداويتك كنتى عطشانه ورويتك
كنت ضلك كنت بيتك عشتى جوايا ورعيتك
بعت عمرى واشتريتك والثلثن كان الوداع
شهدتلك انك خبيره فى الخداع سلمتلك
سلمتى قلبى للضياع





حبینی ..!!


ادیکی عمری ضیفیه علی عمرک بس اوعدینی
اموت علی صدرك
حبینی أد ما تقدری خایف فی یوم تنغیری
عشقتنا وعشقنا الأيام معقول فی هجری تفکری
شفتک وقلت هتبقی حاجه وبقیتی عندی کل حاجه
بقیتی احساسی نبضی وانفاسی بقیتی انا تتصوری
مبقتش عایش غیر عشانک مبقتش حاسس غیر حنانک
وکأنی مولود النهارده وکأنی غصن لأحلی ورده
وکأنی فتحت عنیا شفت القمر جای علیا
خد ایدی لجزیره أحلام مزروعه حب وحنیه
حبینی کمان وکمان وکمان حبینی ف کل زمان ومکان
حبینی بعقلک أو بجنان حب ابیض واسود أو ألوان
حبینی بإحساس الانسان أو عشق الطیر وملوک الجان





حبينى لحضنك ضمينى خبينى ف حضنك م الأحزان
حبينى ف حضنك دفينى ما هو حضنك غير كل الأحضان
يقوينى ويخلينى على كل ملوك الكون سلطان
حبينى أد ما تقدرى خايف فى يوم تتغيرى
عشقتنا وعشقتنا الأيام معقول فى هجرى تفكرى





میت اکلینیکی !!..

كان لسه علينا بدرى كان ليكى سنين فى عمرى
كان ليكى نصيب فى ليلى وليكى ضوء فى فجرى
من بعد ما عشت ليكى انا ميت اكلينيكى
وبقيت بره الحياه
كنتى الاحلام وحبى كنتى الشريان لقلبى
وبدايته ومنتهاه
كنتى بتتنفسى لى وبتملى عليا ليلى
كنتى سفرى ودليلى أرض العمر وسماه
كنتى الناس اللى ليا دمعى وضحكة عنيا
نبض ف شريان اديا وجع القلب ودواه
سبتينى غريب فى بيتى لما ف لحظه اختفيتى
وبفراقك قضيتى ع العهد اللى قطعناه
اضحك والضحكه دايماً بتكون صرخة عذاب
واسأل وسؤالى دايماً سؤال ملوش جواب





وافضل واخذك في حضنى لو حتى شعرى شاب
كان ايه سبب فراقنا بعد ما كنا اتفقنا
هنكمل عمرنا في حزن بعضنا
لا زمان يقدر علينا ولا خوف يسكن عينينا
مين فينا خان قلوبنا مين هد عشنا
هنعيش تانى الحياه لا والف لا
مين فينا يسامح التانى مين كان في الحب أنانى
مين باع حلمنا في ثوانى مين دمر حلمنا
مبقاش نبض في عروقى مبقتش بشوف طريقى
بشوف الكون تابوت بعيش جواه واموت
وبسمع صوت ندايا يشبه السكوت
حاسس لمسة اديكى فاكر نظرة عنيكى
قلبي بينده عليكى ويقولك مش ناسيكى
من يوم ما بعدتى عنى وانا ميت اكلينيكى






حب مجرد .. !!

اتعلمنا كثير من بعض لما بقينا بنشبه بعض
اتعلمنا واتكلمنا إلا عن الأشواق في البعد
لما شفائفي حزنوا شفائفك خدوا ومنها وادوها كثير
نفس الضحكه نفس الهمسه نفس القدره على التعبير
كنت غريب ولقيتك وطني ولقيت بين احضانك سكني
كلمتنا بنطقها سوا فرحتنا بنقسمها سوا
عشنا حياتنا كل حياتنا حتى الذاد والميه هوى
اول لمسه ولحن جميل عزفه معانا ساعتها النيل
شهدناه على عهد ما بيننا شاف صدقنا ساكن في عيوننا
شهدناه على حلم سنيننا وعلى قلوب في الهوى بتميل
كل مشوفك بشتاق اكثر بشتاق اكثر واكثر واكثر
اصل الحب ما بيننا جديد جالنا وجاب وياه العيد
خللا شموع ليالينا تايد بيزيد يوم عن يوم وبيكبر
كل ما فيا بينطق اسمك بعشق روحك واعشق جسمك
أجمل نظره واجمل بسمه وعلى شفائفي كثير بيتسمك
حب جديد وظهر ع الأرض خللا الدنيا جنانين ورد





كان مخلوق لنا لوحدينا ببعوض حرمان في ماضينا
معرفة هوش عشاق قبلينا ولا عرفوش من بعدنا حد
حب بجد بجد بجد مش أوهام وف يوم تتهد
أجمل فرحه بأجمل وعد أجمل ضحكه وأجمل خد
سحرة عيون قلب حنون بيدفوني ف عز البرد
بدعي ياربي تفضلي جنبى ولا نحتاج لسؤال ولا رد
اتعلمنا كتير من بعض لما بقينا بنشبه بعض
اتعلمنا واتكلمنا إلا عن الأشواق فى البعد






بطلة قصتك ..!!

كان حلم ومش حقيقه ما انا كنت زمان بريئه
مات الحلم ف دقيقه وفارقت مخدتك
لياليك كانت جميله اجمل من الف ليله
كنت ف عينك اميره كان حبي قضيتك
كنت بتسهر عشاني وبتشرب من حناني
لو اغيب عنك ثواني بتحس بغربتك
كنت بتكتب فى وصفى عن حزن جميل يدفى
كنت بتعشق شفائى كات هي فاكهتك
كانت نظرة عيونى تحييك وتموتك
احلام عقلى وجنونى بترسم خطوتك
مش هيا لهفتك ولا ديا لمستك
ولا دى فرحة لقانا ولا دى حنيتك
مبقاش شئ فيا عاجب وبقيت بتأدى واجب





مبقتش خلاص حبيبتك ولا بطلاة قصتك
اديت على اء ما اقدر من غير ما احسب وافكر
ياما كنت ف حزنك اسهر كان حضى دنيتك
وانا وانت ف حزن بعض نزلت انت الستاره
على كلمة شوق وبعء نزلت منغير اشاره
كان حلم ومش حقيقه م انا كنت زمان بريئه
مات الحلم ف دقيقه وفارقت مخدتك



انتى وانا ..!!

كنا هنا انتى وانا شاهد علينا حلمنا
الشط شاف طفلين سوا أو عصفورين عشقوا الهوى
قاعدين على الرمل الصديق وادين بريئه ف ايد برئ
كانت حبيبتى وقتها بتخاف أوى على عشا
نبنى البيوت وتهدها الموجه نبى زيها
وكنا نلعب ولما نتعب بأدينا نسند بعضنا
انتى وانا.....انتى وانا

رسمنا للحب جناحين مكتوب عليهم كلمتين
اسمين لأصغر عاشقين مكتوب عليهم اسمنا
كان بين قلوبنا اوفى وعد هنعيش كدا ساكنين فى بعض
لا ف يوم يفرق بنا حد ولا أقوى موجه تهدنا
وكبرت والحب معايا أحلامى كبرت جوايا
ورسمت شمس وضلايه وكان ما بينهم عشنا
انتى وانا.....انتى وانا



وفجأه فتحت عينيا مالقيتش ايدك فى اديا
لا بقيتى جنبى زى زمان ولا دنيتى صبحت هيا
ولقيتنى بعدك قلبى غريب ماليش طريق ولا ليا حبيب
آه لو فضلنا صغيرين أحلامنا على أد السنين
نفس المشاعر والحنين نفس القلوب الطيبين
الحب كان بين الضفاير وفردتى شعرك راح وغاب
وكأنه كان عصفور وطاير وبدأت انا رحلة عذاب
اناديكى واشكى للرمل وابكى واحلم بموجه تضمنا
انتى وانا.....انتى وانا





روح عشيقه ..!!

من ارضنا واللا انتى من أهل الفضا
من عهدنا أو من زمان راح وانقضى
انتى اختيار واللا قدر انتى الطوفان واللا المطر
انتى الأمان واللا الخطر حبك رجوع ولا سفر
معرش اقول غير اللى جويا
مقدرش اعيش غير وانتى ويايا
انتى الشراع والضى لسفينتى
يا شمس عمرى واحلى ضلايه
اللى بينا مش غرام حب عادى والسلام
اللى بينا حب اكبر كل يوم بيزيد ويكبر
حب اكبر من وجودى م المعانى والكلام
يعنى كل كلمه حلوه يوم قالوها العاشقين
مش هتوصف لون شفايفك واللا نظرات العينين





واللا خوفى من بعادك واللا افراحي بمعادك
ايوه علشانك بدور عن كلام يقدر يعبر
يوصف الاشواق يصور درت ادور ليل نهار
جوه اعماق البحار واللا فى شمس النهار
عن معانى بحسها عن اميره عشقتها
اقدر اوصف بيها حالى والملاك اللى ف خيالى
ايوه بسهر ليلى واسأل مين يجاوب عن سؤالى
لو باقى ف عمرى ليله اتمنى تكون فى حضنك
لو كلمه تكون أخيره تكون كلمه بحبك
بعشقتك لا برضه اكرت لسه مش عارف اعبر
لسه مش قادر كلامى يوصف الاحساس يصور
يا لحظة صدق فى وجودى يا نهر العشق يا حدودى
يا حب كبير ييفرحنى ويالمنى يا قلب كبير بيكتبنى ويرسمنى
بس بيدور السؤال انتى حلم أو خيال
واللا عشق وروح عشيقه جايه تهدينى المحال





حکمت ف يوم بحرمانى...!!


حکمت ف يوم بحرمانى هجرت الموج و شطآنى
وعشت سعيد ف حزن جديد وسبت القلب وحدانى
يقاسى الذكريات والبعد ويبكى ع اللى خان العهد
مبيفرقش فى بعادك ما بين الشوك وبين الورد
وبين الضى والعتمه وصوت الناي وصوت الرعد
لكن ماضعش العمر ما راحتش منى سيني
لسه القمر بيطل والشمس بتدفينى
والذكريات بتمر بتروح ساعات وتجينى
ولما الدنيا ضاقت بيك رجعت بدمع مالى عنيك
رجعت ذليل تمد اديك وتطلب منى غفرانى
حکمت ف يوم بحرمانى
رجعت لقلب يسامح بينسا قسوة امبارح
ويغفر مهما كان الذنب ومهما الهجر كان جارح





عرفت الفرق بين قلبى وقلب الناس
عرفت الفرق بين حبى وحب الناس
عرفت ازاي زمانى بيضحك لىك عشانى
عرفت الفرق بين الغدر والإخلاص
عرفت ان الدفا حضى وراجع ناوى تسعدنى
ترجع شمس ايامى وعن بعدك تعوضنى
تحقق كل احلامى وعن احزانى تبعدنى
عرفت انك بتهوانى وساكن نفس عنوانى
هقولك حكم قلبى عليك حكمت ف يوم بحرمانى
حكمت عليك بنسيانى





وحشانی یا امی !!..


فی یوم رجعت البیت حزین غضبان من الناس والسنین
لقیتنی مرمی ف حضاها مسحت دموعی بکفها
قالت کلام مفهمتهوش الدنیا فتح وردھا
واتاریھا بتقرا وترقینی وعلى الايام بتقوینی
وف لیلہ راجع عندها محتاج تاخذنی فحضاها
قالولی ماتت امی ماتت ولقیتنی شایل نعشا
البسمه ضاعت والفرحه ضاعت
وعمری ضاع مع عمرھا
وحشانی یاامه ودعوتک وحشانی
بتمنی اشوف ضحکة عیونک تانی
یارب جیالك حبیبه عشقتها حملت
وربت وافتدنی بنفسھا
ارحمھا زی مرحمیتنی وارضاها زی مقویتنی





علی اد ما فی اللیل غطنتی او کنت بغیب واستنتنی
علی اد ماصبرت وشالتنی بالجنه عوض صبرها
رضاءک علیا بدعاها لیا والجنه تحت رجلها
بدعی ف سجودی لسبب وجودی
ولکل ام زیها
کانت معایا فرحی ودوایا هعیش لمین من بعدها
قالولی ماتت حبیبتی ماتت علی کتفی شایل نعشها





الأب ..!!

مبقاش فى الدنيا حد اطمئن ليه بجد
يمسح بإديه دموعى لسؤالى عنده رد
بقيت فى الدنيا وحدى بقيت من غير حبيب
بقيت بعدك ياوالدى فى كون آسى وغريب
بعدك ماليش يا ابويا ظهر وسند وارض
عنيك كانت بتحرس خطواتى كلها
كانت دائماً دليلى خلاص غمضتها
ان ظلمتنى الليالى هروح بعدك لمين
يشفى الجراح يا غالى يحمينى م السنين
فى حضنه يضمنى ويقولى اطمنى
يهدينى بحكمته ع السكه يدلنى
لأول مره احس بكلمة موت يا ابويا





بتقتل روح وحس تهد بيوت يا ابويا
في أمان الله يا ابويا غمض عينيك ونام
لا هتصحيك دموعي ولا هيصحيك كلام
جايلك يارب حبيب محتاج لرحمتك
في رضاك يكون له نصيب يتهنى ف جنتك





قلب شاعر !!..

مع ان قلبي قلب شاعر موّت في القلب المشاعر
حبيت كثير ونسيت كثير
حنيت كثير وقسيت كثير
مبقتش قادر احب واسهر
ونسيت خلاص مبقتش افكر
وقاسيت كثير من كتر ياسى
مبقتش عايش غير لنفسى
حضى اللى كان ليكى مبقاش يدفيكى
كان صعب اعيش حبك واسهر لياليكى
ايدى اللى كنتى بتلمسيها وياما نام خدك عليها
مفضلش نقطة صدق فيها مات فيها ينبوع الحنان
عيني اللى كنتى بتسكنيها مبقتش اشوف احلامى بيها
نارى اللى كنتى بتعشقيها مبقتش نار صبحت دخان
مبقتش فارس من زمان انا مت ومعايا الحصان





والقلب من كتر الأسيه ساب الضلوع وسكن اديا
مبقاش يدق الا بأوامري عشان اكمل باقى عمرى
الحب نار والشكل نور زى القمر رمل وصخور
مش جنه مفروشه بزهور سماه غيوم والارض بور
متضيعيش عمرك كفايه عمرى ضاع
متوهيش قلبك فى دوامة وداع
انسى انك يوم قابلتى قلب مات
واشطينى من سجل الذكريات
مبقتش فارس من زمان انا مت ومعايا الحصان..






انتَ حلم .. !!

خليك معايا هنا الماضي مش ملكنا
نتحاسب انتَ وانا من يوم ميلاد حبنا
مع انى قبل لقاءك قضيت ليالى معاك
تواعدنى واستناك واحلم بقربك هَنا
اتقابلنا واتعاهدنا ع الغرام كل دا قبل اللقا
كان فى المنام
نفس المشاعر والملامح والكلام نظرة عيونك
حتى لونك والسلام
يعنى كل الماضي كنت معايا فيه كنت فارس
حلم ياما حلمت بيه
عشت قبلك ليك لوحدهك صنت قبل لقانا عهدك
كنت اطولك ضفايرى نفسى توصلك فى بُعدك
ما انتَ حلم حلمته وانا لسه بضفاير
ما انتَ وشم رسمته ع الحيط والستاير





لما شجرة جسمى تطرح كنت اضم مرايتى وافرح
واجرى انام علشان اقابلك واقضى طول الليل فى حضنك
فرشتك فوق اعلى نجمه فرشتك ندهتلك
والورد مالى سكتك

يعنى من ليلة ميلادى كنت لعيونك بنادى
كنت عمرى كنت زادى كنت ايامى وبلادى
كل املى تكون حياتنا زى احلام ماضى فاتنا
الغرام يسكن فى بيتنا وف كلامنا وف سكاتنا






المحمول..!!

قادر اشوف الكون من غير عيونك كون
بعيوني وحدى اكون ومش بأى عيون
قادر أعيش وهعيش ناسى اللى مر حمنيش
اللى وقت احتياجى لحضنه محضنيش
تليفونى ثابت او محمول بكلامنا كان دايماً مشغول
ع الخط كان قلبين على طول والشبكه عشقت موالنا
وف لحظه زى امنا حوا خرجتى آدم م الجنه
نفس الكلام مبقاش هوا وقطعتى كل خطوط بيننا
نمرة تليفونك وقتها حفظتها وعشقتها
دلوقتى انا دلّتها لأنى مش محتاجها
مبقاش خلاص بيننا اتصالات مبقاش رسايل ولا رنات
مبقتش هسمعلك حكايات كل اللى بيننا اهو ماضى وفات
هنساكى واكنسل أرقامك وان مره طلبتك مترديش






حالة حب..!!

حالة حب دائماً عايش حالة حب
ودا من حقى طول ما انا باسمع دق القلب
عايش دائماً بالاحساس نبضى ودمى والانفاس
ليه بتقولى علينا كبرنا عمر السن ما هيغيرنا
مش ناسيين حبنا فى الزحمه دائماً بيننا موده ورحمه
شايك دائماً ورده جميله زى ما كنتى ف اول ليله
مش كلنا بنحلم صغير او كبير
مش كلنا بنحلم زى العصفور نظير
مش كلنا بنعشق من الورد العبير
رحلة عمر قضيتها معاكى كنت بطير دائماً فى سماكى
همساتك حب لمساتك حب انفاسك حب احساسك حب
انا وانتى اتنين اشتركوا ف قلب
يعنى كبرتى ما انا زيك فى السن كبرت





اتغيرتی ما انا شعری شاب واتغيرت
 لكن قلبی لسه صغیر من یوم ما اختارك واخترت
 لا انا فکرت ف غیرك لحظه ولا فکرتی ف یوم تنسینی
 دایماً عندی اجمل ورده فوق احزانی بتعدینی
 کنتی غرامی ولسه غرامی ایوه ولسه فتاة احلامی
 کنتی هیامی ولسه هیامی وغرامک شعری والهامی
 لسه الفرحة اللى ف ایامی وعیونک حقنی وبرشامی
 انتی جزیرتی اللى بعیش فیها وانتی سفینتی وبحر غرامی
 طول عمری بسمیکى حبیبتی والناس بیسموکی مدامی





ازای عیونک تخون...!!

مبقتش تفرق معایا معایا او مش معایا
منك تكون النهایه منی تكون النهایه
نحب نكره نغير مبقتش تفرق كتير
نسهر كتير او ننام م القلب كان او كلام
بالصلح او بالخصام هنروح لنفس المصير
ایام تفوت او لیالی حقیقه واللاف خیالی
رخصت او عندی عالی صوتك هدیل او زئیر
ازای عیونك تخون وازای عایزنی اسامح
بین الشكوك والظنون مبقاش لحبك ملامح
مبقتش احس بوجودی جمیله او مش جمیله
وازای هلوّن خدودی وضحكتی مستحیله
لو سندريلة زمانی او مونالیزا فمکانی





كرهت لون فستاني وكرهت حتى المرايا
قلبي اللى عاش لك زمان وسقاك محبه وحنان
ما لقاش فى حضنك امان بمقاش لحنك اسير
مبقتش تفرق معايا بمقتش تفرق كثير






لعبه ..!!

قولتيلي بحبك قولتيها وبقالي زمان مستنيها
صدقت الدنيا وصدقتك صدقت الأحلام وعشقتك
حسيت الكلمه ومعانيها وبنيت أحلام عمرى عليها
حبيت أيامى ولياليها وبقالي نصيب فيكى وفيها
قولتيلي مغيث غيرك ليا فارس أحلامى الورديه
اخترتك من كل الدنيا ورجعتى تانى حسبتها
وصحيت لا لقيت حضنك جنبى ولا قلبك وعنيكى حبايى
لا انا قادر اطول نجمة حبى ولا لاقى أرض امشى عليها
حدوته وكنتى بتحكيها وعليا ف يوم مثلتيها
صدقت عيونك وشفافيك صدقها القلب وعاش ليها
كان كل ما فيكى بيندهلى ويقول محتاجلى ومشتاقلى
كات لعبه وياما لعبتيها على غيرى وياما رسمتيها
مليتى اللعبه كسرتيها وكأنك يوم ما عرفتيها
كان كل منايا ابقى معاكى دلوقتى منايا انسى هواكى
أسهرلك ليه واستناكى قصتنا بإيدك نهيتيها





عطله رسميه ..!!

ياللى عرفتوا الحب قبله عشتوا الحياه احضان وحنيه
وانا اللى تهت ف برد ايامى ضاعت سنين العمر باديه
النهارده عطله رسميه النهارده اجازه دوليه
لما شاور قلبى على قلبك واما ندهت عينى على حبك
وابتديت اعرف فوايد قلبى وعينيه
النهارده وقفت الساعات النهارده ضحكت الدمعات
لما فجأه شفتك انتى وانكتبلى انك حبيبتى
مين كان يقول بعد الزمان ما عدى
مين كان يقول نتقابل النهارده
مين كان يقول تهوانى اجمل ورده
واحس قلبى بيفرضك عليا
واحس إنك نور لضى عنيا
كنت رافض ارتبط بأى واحده
وكنت راضى اعيش بقيت عمرى فى وحده





لكن عيونك صحووا قلبي من بيات
خلوني اندم ع اللي راح مني وفات
مبقتش حاجه وانتى حاجه بقيت انا وانتى حاجه
فهمانى وبقيت افهمك منغير كلام
دايمآ عيوني تكلمك بالابتسام
بقيتى خلى بقيتى ضلى
وباقى عمرى اللي فاضلى
سامحيني معرفتش طريقك من زمان
مع انى دايمآ كنت محتاج للحنان
كان نفسى اعيش العمر جنبك
وف حضنك اسمع دق قلبك
وف حضنى اديكى الامان
لكن اللي باقى ف عمرى لو كان حتى يوم
هاخذك واطير فوق السحاب بين النجوم
ولكل نجمه هقدمك واقول حبيبتى
النجمه هتقول روعتى من نورك انتى





يا احلى حاجه ف دنيتي
لا دا انتي كل دنيتي
انتي اللي راح وانتى اللي جاى وانتى طريقي وخطوتي
وعشان بعثلى ربنا اجمل هديه وعشان لقانا فرح عم الدنيا ديا
النهارده عطله رسميه النهارده اجازه دوليه






عِشِّي اللَّحْظَه ..!!


وبتسألِي في الجأى ليه منا ياما طمنتك عليه
هنعِش دايمًا في قلوب بعض عندى سؤالي وعندك رد
خايفه مني والا خايفه عليا والا خايفه م الليالي الجايه
كنتي قبل لقانا ايه وانتى بعد لقانا ايه
كنتي تايهه زى ريشه في الهوا جوا حضى عشنا أحلامنا سوا
ليكي عاشق م الهوا بيخاف عليكي
ايوه عاشق جوا قلبه بيداريكي
بعد غربه عشتى فيا وعشت فيكي
وف عيونى سكنتى وسكنت ف عينيكى
من زمان ايوه شفتك من زمان
من زمان واسمى واسمك ع الحيطان
منقوشين بالنور في جدران المعابد
ع المسلات والكنائس والمساجد
يعنى ارواحنا البريئه من زمان عاشوا الحقيقه





عاشوا قبل لقانا بألاف السنين
صانوا سر هوانا والشوق والحنين
حب اكبر من حياتنا حب مخلوق جوا ذاتنا
شوق ملينا بينادينا للى جاى وذكرياتنا
تكبرى يكبر هوانا تسهرى يسهر معانا
عيشى اللحظه معايا بنعيش احلى حكايه
ليه هنفكر ف اللى هيحصل ومافيش بيننا نهايه
اوعدك هتكونى جنبى انتى وعيونك حبايى
حب بينور شموعنا ويايديه يمسح دموعنا
لو نغيب عن بعض لحظه حبا يضمن رجوعنا





كنت بحبك مجنون ..!!


مبقاش خلاص يفيد تهديك والوعيد
انك هتسيبنى وحدى وهتبدأ من جديد
كان لو بالبعد تهدد الروح عن جسمى بتبعد
واركع لغرامك واسجد كنت بحبك مجنون
كنت اما معايا بتسهر الروح جوايا بتسهر
كات عتمة ليلي تنور واحلم مع أحلى عيون
ولا يمكن لحظه اتصور انك ممكن تتغير
وانك ع الهجر هتقدر تبعد تغدر وتخون
مكنتش بتفرق عندى طول ما انت حبيبي لوحدى
وبقول دا سحاب ويعدى احساسى ده كله ظنون
كان لما ف لحظه تكشر لو عز الصيف بتمطر
والشمس تغيب ولا تظهر والتلج يغطى الكون





مبقتش ف نفس غلاوتك لا لسانی بینطق سیرتک
ولا عینی بتعشق صورتک ولا بخضع مهما یكون
ما انت اللى بدأت بهجرى وقتلت زهورى وشجرى
وزرعت العتمه ف فجرى وبقیت على قلبی تهون






مبقاش من حقنا ..!!

مبقاش من حقنا نتقابل وحدنا
تلمس ايدك اديا تسند راسك عليا
مبقتش الشمس تصحا على دقة قلبنا
مبقتش قلوبنا تفرح لمعاد ولا هجر يجرح
مبقاش ع الارض مطرح لغرامنا وحبنا
مش حاسه بالامان ومليش فى الكون مكان
ومليش حبيب فى حضنه يدارينى م الزمان
بنسلم للجراح ونقول مكتوب علينا
وبندم ع اللى راح وضيعناه بأدينا
وكان يومها السبب لحظة شك وغضب
نادينا ع الفراق لما علينا انكتب
خرجت من مصيرك وخرجت من مصيرى
خلاص بقيت لغيرك وخلص بقيت لغيرى
عرفنا ازاى فى لحظه ندمر حلمنا





لكن رغم اشتياقنا وقسوة ليل فراقنا
والحزن اللى ف طريقنا هنكمل عمرنا
بموت فى كل ثانیه بتمر ف بعدى عنك
وبكره اعيش ف دنيا ف يوم حرمتنى منك
باخذ صورتك ف حضى واحلم ترجع تاخذنى
واسمع صوتك بودنى مع انك مش هنا
مبقاش من حقنا نتقابل وحدنا
تلمس ايدك اديا تسند راسك عليا
مبقتش الشمس تصحا على دقة قلبنا
مبقاش مبقاش مبقاش من حقنا






اسمك وطن...!!

لو كان لي في الوجود غيرك حزن وسكن
كنت نسيت العهود كنت هجرت الوطن
ونسيت كل الوعود ورضيت حكم الزمن
لكن حبك في دمي كره بيضا وكوره حمرا
بيمر ف كل جسمي ييفوت مع كل دوره
يعني بشوفك بعينك وبتشوفني بعنيا
وبدور في بحور سنينك والمس نفسي بأديا
حبيت فيك البراءه في زمان مفيهوش برئ
وكتبتك في البطاقه الصاحب والطريق
اسمي واسمك في خانه اسمين بقوا اسم واحد
حتى ف خانه الديانه ديانتنا حب واحد





كلمة حرمان محاله مبقاش الحب حاله
دا طريق بمشيه واقرب وبشرق فيه واغرب
لا بتوه ولا منى يهرب واعطش من حبك اشرب
انت الكون والزمن والاحضان والسكن
لما اكتب اسم وطنى بكتب اسمك وطن





خصم .. وحكم !!..

طفل صغير يبصرخ فين امه وفين ابوه
كانوا ليه سبب وجوده وليه هجروا وسابوه
يواجه الخطر والبرد والمطر
يبكى لاحد يسمع ولا اهله بيرحموه
مش هيا دي العيون ولا هيا دي الشايف
مش دا القلب الحنون اللي على حبه خايف
مين فينا اللي ظلم ومين اللي اتظلم
ومين وقت الفراق كان خصم وكان حكم
مش دا الحب اللي كان زى الطفل ف قلوبنا
بنصونه مهما كان وبنغفر بيه ذنوبنا
مين كان فينا السبب مين فينا ف لحظه باع
مين فينا الى كتب على احلامنا الضياع
الليله راجعه ليه من بعد ما طفلى مات
انا بوسته من عينيه ودفنته من سكات






مش من حَقك ..!!

مش من حَقك تنسا هو انا ف غمضة عين
مش من حَقك قصتنا بيملكها اتنين
عايز نبعث عن بعضينا قوللى اروح انا فين
من ليالينا وكل ماضينا من قلبى وم العين
بعد سنين ضمتنا سوا جى تقوللى كفايه هوى
تشهد دموعى عليك يشهد سهر الليالى
تشهد عليا عنيك يشهد قلبك ياغالى
مش دا الطريق من اوله اللى اتعاهدنا نكملة
لو يوم هتنسا مين انا ارجع لقلبك واسأله
هيقول دوا الأحزان انا والنبض والشريان انا
وانى ف هواك ضحيت معاك وزرعت ايامك هنا
مش بقلل من كرامتى لما بتمسك بحبك





وارفض انهي معاك حكايتي واحتكم للناس وقلبك
أنا مش اد ضياع الحلم ولا أد الإحساس بالظلم
حقك تؤمر قلبي يطيع مش من حقك منى تضيع
حقك اكون واحة احلامك انما تبعد مش من حقك
مش من حقك تنسا هو انا ف غمضة عين
مش من حقك قصتنا بيملكها اتنين






بحر الذكريات...!!

جی تانی لیه تقوللی لسہ حبك عندی عالی
مش انا اللى خنت عهدك واللا ضيغت الليالى
جی تبكى لیه وتندم بعد ما راح اللى راح
بعد ما نسيته حبك جی تانی تقول سماح
بعد ايه جی تواسينى بعد ايه اللى كان
بينك وبينى يسوى ايه
يسوى ايه الغدر بيا يسوى ايه يسوى ايه
ودموع عنيا تسوى ايه
كان زمان لمسة ايديك بتصحى حبي كان زمان
كان زمان دمعة عينيك بتبكي قلبى كان زمان
كان زمان خوفك عليا يدي للقلب الامان
كنت بتمناك معايا ف وحدتى ف ايام اسايا
لكن العمر اللى فات يمحي اغلى الذكريات





يمحي كل كلمه حلوه قلتهاالى وقتلتهالك
 يمحي حتى كل خطوه فى الميعاد كنت امشيهالك
 كنت ادارى ع العوازل كنت اقول ما تفرحوش
 يوم هيبجى دا احنا بيننا عهد غالى ما ينساهوش
 وفضلت احافظ ع اللى بينا للنهايه
 حفظت حبي وصنت ايامك معايا
 كنت فاكر لما ترجع هتلاقينى ف انتظارك
 ابكى من شوقى واقولك الفراق دوقنى نارك
 انا اللى كنت بالصبر اداوى قلوب الناس
 وانا اللى كانت بسمتى تملا الوجود احساس
 نسانى غدرك بسمتى والفرح راح من دنيتى
 ياللى كنت زمان حبيبي اتنسا حبك ومات
 كل شئ كان حلو بيننا تاه فى بحر الذكريات





اتاگردی ..!!


اتاكدی قلبی معاکی ببندی يتسمى قلب يعرف يحب
وبنور عینکی بیتهدی اتاكدی
زی الطفل ببداً عمره زی الليل میقابل فجره
زی الطیر مبعشق شجره قلبی معاکی ببندی
وكان لحظة میلادی لحظة مجیتی ف میعادى
لحظة تلاقى العیون لحظة سلام الأیادی
لا سمعت كلام زی كلامك ولا شفت غرام زی غرامك
لا صالحنی زمان ولا دقت حنان ولا عشت ف یوم غیر آیامك
مبقتش احلم غیر بعینکی مبقتش بخاف الا علیکی
مبقتش اشتاق زی العشاق ساکنه ف دمی وساکن فیکی
باتحدی الدنيا بإخلاصك وبطعم الصدق ف إحساسك
وكان الكون ما فیهوش غیرك ولا بسمع فیه غیر انفاسك
وكاننا آدم وحواء وبنسكن الكون وحدنا
الحب بیتنا وذادنا هواً وشموع تنور عمرنا





مش قادر اصدق ولا افكر ولا حتى اتخيل واتصور
منغير الوان وف لحظه كمان لونتی حیاتی بلون اخضر
نورتی شموع ومسحتی دموع رشیتی علی الأحزان سكر
اتاكدی قلبی معاکی بیبتدی يتسمى قلب يعرف یحب
وبنور عنیکی بیهتدی ااتاكدی ااتاكدی





نخاف علیک منی...!!

قابلتك يا حبيبتى بعد ما فات الأوان
بعد مضيت عمرى وراح منى الزمان
اجمل ايامك جاين لكن ايامى را يحين
كنت بكذب نفسى واقول الحب ما يعرفش سنين
انا مش انانى ومستهلش تبىعى احلامك عشانى
صحيح بقيتى الدنيا ليا بقيتى نبضى ونور عنيا
محتار ما بين احساسى بيكى وبين صراع عقلى وجنانى
ظهرتى ف عمرى ليه من بعد ما عمرى عدى
هتاخذى منى ايه يا احلى واغلى ورده
الفرق كبير ما بين امبارح والنهارده
انا قلت خلاص هيبقى قلبى منغير حبيب
ظهرتى ف عمرى فجأه فجر بيحضن مغيب
اشمعنى انا من بين الوف حبى يناديكى





اشمعنى انا دا انا كلى خوف م الشوق عليكى
بتقولى سمعتى عنى وقلولك انى وانى
فى غرامى ما ليش مثيل نسيانى مستحيل
كل اللى اتقال حقيقه لكن من كام سنه
وعشان ساذجه وبريئه مش شايفه منى انا
تجاعيد ولا شعر ابيض ولا قلب عجوز بيمرض
ولا فرق ف عمرنا ولا ايه مكتوب لنا
بجبك آه لكنى بصدك غصب عنى
وعشان سنك وسنى بخاف عليكى منى





ورق التوت...!!


اتكلمى خايف هوايا يموت اتكلمى هيضيع هوايا سكوت
واللا انتى عايزه تأجلى حلمى لما تشوفينى جثه جوا تابوت
انا كنت آدم عارى قدامك خليكى حوا وشيلى ورق التوت
نفسى المسك وتكونى محتاجه المسك
اتنفسك وتبات عيونى تحرسك
وكأنى نقطة دم جوا شريانك عايشه عشانى
الحلم وعايشه علشانك
ازاى شفايفك لسه عاجزه عن الكلام وازاى
سكوتك يبقى شلال م الآلام
قلبك حجر بتسلمينى للقدر قلبك
أمر ليلى ونهارى يكون سهر
بهون عليكى وعمرك ماهنى عليا والمس





ایدیکى تفرح سنینی الجایه
بتکلمینی واکلمک فی خیالی ویاما نمتی
ف حزن قلبی لیالی
عایش وحید حایر عمری ورق طایر مش
لاقی مرسی ولا قادر انسی
خایف اوی یقتل هوایا سکوتک خایف
اوی یفوتنی یوم ویفوتک
ابعد صوتک ینادی علی قلبی وتوعدی
یقربلک فؤادی تتوهی وتبعدی
بردان اوی والبرد عشش فی سنینی بردان
اوی محتاج لحزن یدفینی
حیاتی حروف ملخبطه ربیعی خریف صیفی شتا
قولی بحبک اورافضه حبک مش حاسه بیک والذنب ذنبک
وان وعدی اعیش لوحدی وقربی منک زی بعدی
مش هتحمّل طول عمری م الصمت هیفرغ صبری
لو فضّلتی السکوت ومجاش لسؤالی رد
هبعدهنک واموت فی حزن ای حد





تاهت احلامنا منا ..!!

تاهت احلامنا منا في زمان مبقاش زماناً
كانت ايام وكنا يسقينا نقول كمان
لكن غدرك غيرني هددت كتير تهجرني
مبقتش ف يوم تعذرني ولا حاسه معاك بأمان
اديتك كل ما عندي ورضيت بنصيبي ووعدي
ضحيت بسمايا وارضى ومخدتش غير احزان
واتارينى بعيش في خداع لك كل مناسبه قناع
بتسمى الهجر وداع وتسمى القسوه حنان
وبتسأل بهرب ليه م الحب ومن لياليه
منا بُعدك خدت عليه وقدرت على الحرمان
من قبل ما تبعد هبعده مش هر كعلك ولا هسجد
لو بُعدك شمسي هتبعده لو قلبي يعيش عطشان
بعد ما حبك ضيعني لا هقولك ولا تسمعني





لا كلامك هيرجعنى ولا يوم يجمعنا مكان
هنسى ان ف حزنك فجرى كان دايمآ يطلع بدرى
وهحايل بعدك قلبى يغفر احساسى بذنبى
وكأنه ما دق لحبى وكان الحب ما كان
وابدأ مع قلب يقدر يدنى مشاعر اكر
يقدر على قلبى يآثر ويفجر فيه بركان





لحظه ..!!

كنت فاكراً لما اقابلك مره تانيه مش هنتلقى
يوم لقانا غير كلام
كل واحد فينا عاش في البعد دنيا واللى
كان ما بينا تاه وسط الزحام
واتقابلنا مره صدفة ايوه كانت احلى صدفة
شفت عيني بتجري وبتحضن عينيكي د
ق قلبى بينتفض من شوقه ليكي
لحظه فيها حقيقى عشت ايوه بعدك كنت مت
كنت تايه وسط غابه ولطريق النور رجعت
افتكرنا ساعتها قلت وقتى ايه
كنتى حلمى وكنت حلم حلمتى بيه
كنا حضن الحب وشفايفه وعنيه كنا ماضى
جميل فضلنا نعيش عليه





يومها قلنا كلام كثير من غير كلام وف قلوبنا ا
لحب مارد نام وقام
قام ياخذنا للى فات قام يصحى الذكريات
الايدى اتشكت غنى القمر والطيور اتبسمت فوق الشجر
والزمان مبقاش زمان اتملى حب وحنان
يومها مكنش مبينا عتاب حكم البعد ماكنش بأيدنا
عشنا احباب وبعدها احباب والايام حكمت ببعدها
حته منى ولسه منى والزمان خانك وخننى
وف لحظه وسط الاحلام رجعت احزان الايام
الفراق خبط على شبكة ايديا وشبكتك
قالى ليك سكه وليكى سكتك
سكة الماضى اللى راح من عمرنا
واللى عاشها كل واحد منا
شفت الدمع ف عنىكى شوفتى الحزن ف عنيا
مش عايز اسيب اديكى اللى بتحضن ايديا
وافترقنا مره تانيه زى ما ف لحظه التقينا
كل واحد راح لدنيا بس عاش الحب فينا





خایف علیکی...!!

خایف علیکی م السفر خایف علی حبی الوحید
یا اُغلی من کل البشر ازای اعیش وانتی بعید
خایف علیکی تهجری بستانی و مشفش یوم ضحکه عیونک
تانی

دانا کنت بشتاق وانتی جنبی لعینکی وشفایفک حبایی
اعمل ایه بعد السفر لما هیغیب القمر
والقا نفسی غصن غابت زهرته
یبکی قلبی بین ضیاعه ووحده
لما عنی ف یوم تغیبی قولی مین هتقول حبیبی
لما اشکی مین هتسمع شکوتی واما ابکی مین هتمسح
دمعتی


مین یا اُغلی الناس یا عمری هیصاحبنی ف غربتی
ما انتی عارفه انی غیر حزنک





مليش وانتي شايفه انى لعيونك بعيش
يعنى بعدك او فى بعدك الحياه متهمنيش
لو بأيدى لما قولتى فى يوم هسافر لو بأيدى
كنت قطعت التذاكر
كنت خبيت الحاجات كنت وقفت الساعات
كنت حلفتك يا عمرى باللى جاى وباللى فات
لكن المكتوب عليا تبكى م الاشواق عنيا
افضل استنى واستنى واستنى وافضل اتمنى واتمنى واتمنى
تجيني فرحه تملا احلامي ولما اصحى القاكي قدامى
عايز اقولك ان كلك حر شمسك ولا ضلك
كل نقطه وكل حاجه فيكى قلبى سايبهم امانه بين ايديكى
اتكتب ليكى السفر واتكتب ليا السهر
اتكتب خوفى عليكى لو مسافره والا راجعه م السفر





احلى اغانى...!!

مش هقولك يوم بحبك اللى ياما كتير قالوها
مش هقولك انى جنبك بملك الدنيا وما فيها
الكلام مش هوا غايته عمره يوم ما كان هوايتى
انما الاحساس فى قلبى والامانى وحلم عمرى
حتلاقيهم ف ابتسامه فى انتظارى ليك وصبرى
كل كلام فى الحب اتقال كل حقيقه وكل خيال
مش حيصور فرحة قلبى بابتسامتك وانت جنبى
واللا لحظة شوق فى بعدك واللا حيرة قلبى بعدك
باسمع قلبى يقولك حبك غالى عليا
ودموع عينى تقولك انت النور لعنيا
انت الماضى وانت الحاضر وسنين عمرى الجايه
وانا جنبك ايامى ثوانى وبحب الايام وزمانى
ياللى كلامك احلى اغانى على اوتار قلبى ووجدانى





قرب منى كمان وكمان خلى البعد كأنه ما كان
ياللى معاك الدنيا امان ما بنسمعش عن الاحزان
مين قال ع الحب كلمه وعلى الاحساس كلام
مين قال دا الحب عندى ما بيوصفهوش كلام
لكن حبي ومشاعرى وصورتك فى المنام
اقوى من كل كلمه اتقالت فى الغرام






اظلم ..!!

اظلم اوى احرم اوى اجرح اوى افرح اوى
ابنى السدود خون العهود ابعده ابعده اوى
صدقنى انت الخسران هتعيش عمرك عطشان
لا هتلقى زى هوايا ولا لحظه قضيتها معايا
ولا زى حكائتى حكاية ولا زى حنانى حنان
سلمت لسحر عينيك مبخلتش مره عليك
اديتك كل مشاعرى زى العصفور فى ايدىك
اما انا وحدى هنا بعد الفراق
يمكن احزن يمكن أشكى يمكن
اسهر ليلى أبكى
يمكن اصرخ من عذاب الاشتياق
ايوه هحزن لما احس بوحدتى
كنت دايماً بتشاركنى دنيتى





كنت عمرى كنت جنه كنت نار
كنت حزن كبير يساعنى ليل نهار
دايماً اظلم بكى قلبى م الألم
مش هسلم مش هعيش لحظة ندم
مهما قالوا الناس عليك مش هقول جرحى بإيديك
مش هقول للناس ظلم مش هقول للناس ظلم





اخيراً فلنتها...!!

اخيراً قلتها وبقلبي سمعتها
كلمه لا سمعت أغلى ولا أحلى منها
اخيراً قلتها لي حققت اللي ف خيالي
فرح الأيام ندالي من رقة نطقها
لقتني غصب عنى بابكي واضحك واغنى
باحضن كلمة بحبك وارقص على لحنها
ياما اتمنيتها منك وداريت احساسى عنك
كان قلبي يقولى انك هتقولها ف وقتها
طول عمرى هعيش اسيرتك وكفايه اكون حبيبتك
وكفايه تكون حبيبي م الدنيا كلها
حسيت ان البدايه لعمرى من هنا
حسيت ان الحكايه حكاية عمرنا






لحظة ضعف..!!


في لحظة ضعف مني حبيتك غصب عني
انا وقلبي الكبير
وشفتك نجم عالي بينور لي الليالي
ويحدد لي المصير
سلمتك كل امري ولقيت وياكي عمري
لأيامك اسير
اتعلمت كثير في هواكي اتعذبت كثير
اتعلمت اطير في سماكي واتعلمت اغير
كنت بشوف في هواني هنا كنت اتمنى تجيني هنا
واسمع صوت انفاسك تاني وانتي ف حضني
واسمع دقة قلبك احلى لحن ف ودني
واتاري فعذابي سعادتك قلبي دقاته بإرادتك
مش غلظتي اني هويت وبكل شئ ضحيت





وحفظت عهدی معاکى حب وموده وبيت
لکن م اللحظادى ههرب من دنياکى
وانسى سنين الماضى اللى قضيتها معاکى
مش ههسلم يوم ارادتى حبى مش هيكون عبادتى
حتى لو ضاعت آمالى حتى لو ضليت سعادتى
م الليلادى هقتل الحب ياديا م الليلادى
هلغى صورتك من عنيا
انسى الماضى وانسى الحاضر واحيا ايامى اللى جايه
ابتدى قصه جديده ما افتكرش تكون سعيده
لکن ارحم من عذاب شوقى لعينيكى
ايوه ارحم من دموع تنده عليكى
يا قمر م الليله مش هتشوفنا تانى
مش ههسهر مش هقول فى بهاء اغانى
ما انت ما قدرتش تحافظ ع اللى بينا
ما انت ما عرفتش تنور ليل سنينا
مش ههسلم يوم ارادتى حبى مش هيكون عبادتى
حتى لو ضاعت آمالى حتى لو ضليت سعادتى





هنبداً من جديد ..!!

صدقك كلام الناس ونسيت ايامي خلاص
وبنيت شكك على كدبه ملهاش معنى ولا اساس
ما انا ياما سمعت عليك من ناس بتشكك فيك
معملتش زيك ليه مبعدتش عنك ليه
علشان انا حبك عندى اقوى من الشك وحيرتى
بيصحى النبض ف قلبى ويقول للحيره انسيه
مش انا اللى اخدع واخون وارسم الشوق ف العيون
دا انا حبيتك حب يخلى حتى جراحى معاك بتهون
انت حبيبي وقلبي يقولها قبل لسانى
انت حبيبي اللى معاه بتحدى زمانى
متصدقش كلامهم تانى متفكرش ف يوم تنسانى
لو يوم تسمع كلمه عليا ابقى اسألنى وارد عليك
اعرف مين بيشكك فيا وتشوف ظلمى معاك بعنيك
شفت كلامهم خدنا لفين كان هيضيع حب سنين





كان هيخلى الفرحة دموع والبسمه اللي ف عمرى انين
دا احنا هوانا يا عمرى رغم كلام عزالنا
زى الطفل بيكبر ويزيد بين احضاننا
ياللى بتغيروا مننا اعشقوا وحبوا زينا
تلقوا ف ليل الغربه شموع والاحزان افراح وهنا
اكبر يا حب وزيد وانتي اكرى يامواعيد
خلى الأفراح تغنى والدمعه تروح بعيد
رجعت ليالينا تانى وحبيب العمر جانى
احتاج حضنى وحنانى وهنبداً من جديد






الهجرينى...!!

اهجرينى اخدعيني ضيعى أجمل سنيني
توهى تحت الأرض أو فوق السحاب
بين عيدان الورد أو بين الضباب
مش هتاخدى الحب منى جوا قلبى غصب عنى
بيه بعيش ايام حياتى شمعته بتنور ليالاتى
ملكى انا حبى ليكى ملكى انا
ايوه حبك ملكى وحدى ايوه حبك ملكى انا
اهجرينى وانسى وعدك مش هتوه فى الدنيا بعدك
أما حبك هوّا عمري مش بإيدى أو بأمرى
اختار قلبى أنا اختار لو نار هيكمل المشوار
ومش بإيدى أرجعك ولا كان بإيدى أودعك
افترقنا آه من فراقنا آه الزمن يسبقنا واحنا نجري وراه
ماليش أمل ف لقانا تانى ماليش أمل
كتب عليا الشوق زمانى ماليش أمل





اهجريني عذبينى افرحى بصوت انينى
بكره لازم تندمى ايوه بكره هتندمى
لما تصحى تدورى ع الحب تانى وتحلمى
اهجرينى اجرحينى بكره فيهِ مش هتلاقينى
ياللى معايا ف كل مكان من فين هيچينى النسيان
انسى كمان توهى كمان خلى الحب كأنه ما كان
آما عن الايام تاخذى ازاي ايامنا
تاخذى ازاي ليالينا وماضينا واحلامنا
كل مكان شغنا ورحناه لسه بروحه واشوفك فيه
حتى اللحن اللى سمعناه لسه على لسانى بغنيه
اهجرينى اخدعيني ضيعى أجمل سنينى
توهى تحت الأرض أو فوق السحاب
بين عيدان الورد أو بين الضباب
مش هتاخذى الحب منى جوا قلبى غصب عنى
ملكى انا ايوه حبك ملكى انا
ايوه حبك ملكى وحدى ايوه حبك ملكى انا






وحشانی..!!

مع انك فى شريانى فى افراحى فى احزانى
فى انفاسى ووجدانى وحشانى
مع انك فى تكوينى شموع الضى لسينى
موسيقى شعر واغانى وحشانى
مع انك شعاع الشمس وصوت الهمس
وروح النفس الحادى وايمانى وحشانى
مع انك ورود الفرح آلام الجرح
بحبك وانتى عشقانى وحشانى
مع انك نجوم الليل وحضن جميل
لأيامى وازمانى وحشانى
مع انك قمر فى سماه واخذنى معاه
واحدى زهور فى بستانى وحشانى
مع انك قناديلى اتوه قلبك يناديلى





حروف اسمك مواويلي رموشك شط اوطاني وحشاني
مع انك بداية عمر نهاية عمر
اشباعي وحرمانى وحشاني
مع انك مع انى غريب ويسكن التانى وحشاني
انا آدم أنا هوّا وكنتى الضلع يا حوا
رجعلى الضلع بعد غياب سكتى ضلوعى من تانى
واتارى الدنيا بعد عذاب مع الأفراح مواعدانى
وحشاني.....وحشاني.....وحشاني






العمر اللي فات..!!


رغم العمر اللي فاتوبعد المسافات
مقدرتش انسى حبك ولا لحظه ف قلبي مات
لما انتى هتسيبيني لشوقى ولحنيني
كان ليه بتعلميني اعشق فيكى الحاجات
لقيت ايامى بيكى وطريقى بنور عينيكى
عرفت الدنيا جنبك وبقالى امنيات
فى المهد مات وليدى وف لحظه الحلم ضاع
ازاى رحلة هوانا تكون رحلة وداع
راح عمرى وضاع هنايا وغيوم سكنت سمايا
ليه اول الحكايه يبقى نهاية الحكايه
تُهت ومركب حياتى خديتها الدوامات
نفسى انساكى نفسى لو هنسى معاكى نفسى
ازاى قدرتى تنسى همساتنا والسكات





انساكى كل همسه تقول دى حبيبتى لسه
انساكى كل كلمه بتصحى الذكريات
ولقتنى فى بُعدك تايه وحيد بُعدك
كل البشر اموات كل الشجر حيات
كل الورود دبلت وصفيت الشمعات
حتى القمر مخنوق والشمس مالها شروق
كل الطيور تبكى بدل الاغانى آهات
يا رياح يا سيول قويه يا ارض يا سما
شيلوا صورته من عنيا لو حتى بالعمما
واعمل بعيونى ايه من غير ما تشوف عنيه
فى غياب حبي وحبيبتى اعيش فى الدنيا ليه






آسف..!!

جانى شهيد فى المنام قتله حزام ناسف
يشكى بمر الكلام انا قولتله آسف
لو كانوا ناس زينا لو خافوا يوم ربنا
مكنش هان دمنا ولا اتقتل حلمنا
لا عرفوا معنى الدين ولا فهموا يوم آيه
وبوسوسة شياطين بكدبه وغوايه
ف سكة الارهاب بيقتلوا الاحباب
نسيوا ان لينا حساب والآخره فيها عذاب
نسيوا ان فى ديان بيحاسب الانسان
والآخره فيها ميزان يوزن جرس واذان
بقتل طفل برئ هتدخل الجنه
شياطين خدوك لطريق مبعثش يوم منا
قتلت روح انسان مخلوق يعيش فى امان





بحق كل نقطة دم يوم سالت
وبحق كل كلمه ف ديناً واتقالت
لنجيب في يوم حقك نجيب طارق
وف جنة الرحمن يكون دارك
يارب يا قادر ع الخاين الغادر
احفظ شباب امتي في الجاي والحاضر
املا القلوب ايمان نورها بالقرآن
ارحمنا يارحمان ارحمنا يارحمان






مصر هتنتصر ..!!

ياللى قتلت الورد والعهد والزيتون
ملعون فى كل الأرض وفى السما ملعون
وعدوك بحور العين فجرت فينا بارود
جعلوك غراب للبين من رحمته مطرود
بتقتل روح خلقها ربنا تعمر
مكان متروح بتزرع موت وبتدمر
صدقينى مكشش قصدى كنت راجع اوفى وعدى
راجع اسكن نور عيونك واطفى شوق بعدك وبعدى
كنت جوا القطر م الشباك بطل
كان فى ايدى صحبتين ياسمين وפל
طفل كان قدامى بين أمه وابوه
يبتسملى ابتسم وارجع اتوه
شايف حبيبتى عالمحطه بتنتظر
هجري عليها ابوس اديها واعتذر





عن كل لحظه غبت فيها عنها
واد ايه انا كنت محتاج حضنها
قطرى كان سابق زمانه زى فارس فوق حصانه
نفسى اقبالك نفسى اشوفك تغسلى همى بكفوفك
وف لحظه صحيت على موت ودخان
والنار حواليه ف كل مكان
الطفل مات اصبح رماد والذكريات سافرت بلاد
خدتك فى حضنى انتى وانا والنار بتاكل حلمنا
مع ان م الإرهاب قلوبنا بتتصر
من فرقه الأحباب وحلم بينكسر
بموت وعارف ان بلدى هتنتصر
بموت وعارف ان مصر هتنتصر






رساله من شهيد ..!!

ازای نفرح یا عید ازای نلبس جدید
وعیوننا فکل لحظه بتشوف جثة شهید
یحرم علینا نفرح واخواننا مجروحین
مهو جرحهم بیوجع قلوب المؤمنین
دقت ساعة الادان اذن یا طبلاوی
اشرح لنا القرآن فسر یا شعراوی
اسلامنا یا انسان دین عدل دین رحمہ
بیخاطب الادیان بالعقل والحکمہ
لا شجع الارهاب ولا انتشر بالدم
لا کان شریعة غاب ولا شابه یوم الظلم
واللی عرفناه واتعلمناه کل بشر والدین لله
سامعین صوت الشہید بینادی من بعید
شایفک یا أمی من هنا من فوق سبع سموات





من اعلى درجه وربنا جعل الثواب درجات
شفتك لما جريتى عليا لميتى اللى اتقطع فيا
بوستى جبينى وحضنتينى وبإيدك سبلتى عنيا
خدت كثير من ضعفك قوه علمتيني اصون العرض
علمتيني الواجب هوا انى اموت فى سبيل الارض
ابنك يا امه بقدره سعيد عشت لبلدى وموت شهيد
شفت دموع فى عيونك يا امه مع زغرودة ليلة عيد
عارفه يا امه شفت ايه لما انكشف عنى الحجاب
شفت المصرى الحب ماليه يدى بلده بدون حساب
بس مطلوب الاراده حب مصر يكون عباده



الفهرس

رقم الصفحة	اسم القصيدة	م
٥	أصدقاء	١
٧	كرسيين وشمسيه	٢
٩	حب كبير	٣
١١	مسك و عنبر	٤
١٣	الخابن مش هوانا	٥
١٥	خلود	٦
١٧	شهدتك	٧
١٨	حبينى	٨
٢٠	ميت اكاينيكى	٩
٢٢	حب بجد	١٠

رقم الصفحة	اسم القصيدة	م
٢٤	بطلة قصتك	١١
٢٦	انتى وانا	١٢
٢٨	روح عشيقه	١٣
٣٠	حكمت ف يوم بحرمانى	١٤
٣٢	وحشانى يا أمى	١٥
٣٤	الأب	١٦
٣٦	قلب شاعر	١٧
٣٨	انتَ حلم	١٨
٤٠	المحمول	١٩
٤١	حالة حب	٢٠
٤٣	ازاى عيونك تخون	٢١

رقم الصفحة	اسم القصيدة	م
٤٥	لعبه	٢٢
٤٦	عظله رسميه	٢٣
٤٩	عيشى اللحظه	٢٤
٥١	كنت بحبك بجنون	٢٥
٥٣	مبقاش من حقنا	٢٦
٥٥	اسمك وطن	٢٧
٥٧	خصم .. وحكم	٢٨
٥٨	مش من حقك	٢٩
٦٠	بحر الذكريات	٣٠
٦٢	اتأكدى	٣١
٦٤	بخاف عليكى منى	٣٢

رقم الصفحة	اسم القصيدة	م
٦٦	ورق التوت	٣٣
٦٨	تاھت احلامنا منّا	٣٤
٧٠	لحظه	٣٥
٧٢	خايف عليكى	٣٦
٧٤	احلى اغانى	٣٧
٧٦	اظلم	٣٨
٧٨	اخيراً قلتها	٣٩
٨٠	لحظة ضعف	٤٠
٨٢	ھنبدأ من جديد	٤١
٨٤	اهجرينى	٤٢
٨٦	وحشائى	٤٣

رقم الصفحة	اسم القصيدة	م
٨٨	العمر اللي فات	٤٤
٩٠	آسف	٤٥
٩٢	مصر هتنتصر	٤٦
٩٤	رساله من شهيد	٤٧